



verständlich d'Recht, zousätzlech Propositionen ze maachen, mä souwäit ech dat awer kann an dësem Moment liesen, ginn déi alleguerten an déi nämlech Richtung.

An nach eng Kéier: Däitschland a Frankräich, well se grouss Ekonomië sinn, hu selbstverständlich d'Recht, hir Propositionen ze maachen. Ech gesi keng fundamentale Divergenzen tëschent eis an hinnen, tëschent deem, wat de President Van Rompuy proposéiert, an eis. D'Schwieregkeete si grouss genuch, sou datt mer eis sollen op den Inhalt konzentrieren, an net op deene falsche Plazen iwwert déi falsch Saache matenee streiden.

Merci.

► **M. le Président.**- Merci dem Finanzminister.

Elo komme mer dann zum nächste Punkt, nämlech d'Chamberskonte vum Joer 2010. D'Riedezäit ass hei nom Basismodell festgelegt. Et huet bis elo kee Riedner sech ageschriwwen. D'Wuert kritt elo den Rapporteur, den honorabelen Här Carlo Wagner.

5. Comptes du service intérieur de la Chambre des Députés pour l'exercice 2010

Rapport de la Commission des Comptes

► **M. Carlo Wagner (DP), rapporteur.**- Här President, Dir Dammen an Dir Hären, ech hat et en fait zejoert hei schonn ugekënnegt, eis Reserven hei vun der Chamber sinn em e gutt Stéck zrëckgaange wéinst der Participatioun vun der Chamber un der Acquisitioun vun der Maison Wiltheim, also där fréierer Dresdner Bank.

Wann d'Reserve vun der Chamber sech also op den 1. Januar 2010 nach op 20.072.000 Euro chiffriert hunn, vun deenen der 16 Milliounen Euro un d'Trésorerie de l'État iwwerwise gi sinn, esou huet d'Reserv vun der Chamber sech op den 31.12.2010 nach just op 4.072.000 Euro belaf. Woubäi een awer muss am Viraus och soen, dass dovunner schonn dräi Milliounen virgesi si fir d'Renovatioun vun der Maison Wiltheim.

Déi Participatioun vun der Acquisitioun vun der Maison Wiltheim huet natierlech och hiren Nidderschlag op den Aktiv an op de Passiv kritt. Wann deen den 31. Dezember 2009 nach bei 22,7 Milliounen louch, esou läit deen elo um Enn vun deem leschte Joer nach just bei 7.780.000.

Här President, Dir Dammen an Dir Hären, mir hunn eis an der Kommissioun, esou wéi all Joer an och esou wéi den Artikel 164 vun eisem Règlement interne dat virgesäit, selbstverständlich mat der Analys vun deene verschiddene Konten auserneegesat.

Ech wëll elo awer beileiwen net lech elei mat Zuelematerial ploe. Just Folgendes: Vergläiche mir de Budget, dee fir den Exercice 2011 virgesi war, mat den effektiven Dépensen, esou stelle mer fest, dass mer en fait 2,5 Milliounen - 2.555.000, fir méi genau ze sinn - manner ausginn hunn, wéi virgesinn. Dat sinn ëmmerhin 8,74 Prozent. Déi erkläre sech aus folgende Sektoren:

Fir d'Alleréischts emol: Bei der Section Députés sinn et am Ganzen 844.000 Euro, déi mer gespuert hunn, an dat eben, well eng nei Politik komm ass vun der Europäescher Bank, déi an Zukunft d'Paie vun den Deputéierten iwwerhëlt. Hei vu Lëtzebuerg aus gëtt elo an Zukunft nach just een eenzeg Deputéierte bezuelt, an déi aner fënnf ginn, wéi gesot, vum Europaparlament iwwerholl.

Deen zweete Punkt ass dee vum Personal, wou 314.000 Euro gespuert gi sinn, an dat haapt-sächlech, well an dem Budget virausgesi war, dass d'Beamte géifen alleguerten op den 1. Januar agestellt ginn, wat natierlech net de Fall war. Si sinn am Laf vum Joer agestellt ginn.

Den drëtten déif gräifende Punkt ass dee vum Compte rendu: minus 527.000 Euro. Dat ass doduerch, dass am Budget 19 Editiounen virgesi waren - vum Compte rendu selbstverständlich -, awer der nëmme 17 an en hallwe realiséiert gi sinn. Dir fannt et vläicht komesch, ech hunn et och komesch fonnt: en hallwe Compte rendu. Dat erkläre sech awer duerch de Fait, dass munch Sessiounen op en anert Joer iwwerschwimme ginn. Esou zwar, dass dat dee Moment pro Joer proportionell opgedeelt gëtt.

Här President, Dir Dammen an Dir Hären, et bleift mir nach just d'Firma Deloitte ze zitieren, déi den Audit vun der Konte vun der Cham-

ber gemaach huet. Ech zitieren also: «À notre avis les comptes annuels donnent une image fidèle du patrimoine et de la situation financière de la Chambre des Députés au 31 décembre 2010, ainsi que des résultats pour l'exercice clos à cette date.» Fin de citation.

Dat gesot, stellen ech fest, dass also d'Spezialkommissioun à l'unanimité an och de Réviseur d'entreprises Deloitte der Meinung sinn, dass d'Konte vun der Chamber fir den Exercice 2010 an der Rei sinn. An deem Sënn géif ech lech dann och alleguerten heibanne bieten, léif Kollegen a Kolleginnen, d'Konte fir den Exercice 2010 ze approouvieren.

Ech wëll et dann och net verpassen, fir mam gudden Beispill virzegoen an domadder den Accord vun der Demokratescher Partei ginn.

Ech wëll dem President awer och nach just eng Resolutioun iwwerreechen. Eng Resolutioun, déi also seet, dass d'Chamber déi Konten unerkennt an dass mer d'Konten an och de Rapport vun der Commission des Comptes un d'Cour des Comptes géife weiterreechen.

Résolution

La Chambre des Députés,

vu le rapport de sa Commission des Comptes,

approuve

les comptes de l'exercice 2010 et prie son Président de transmettre la présente résolution et le rapport de la Commission des Comptes à la Cour des Comptes pour y être enregistrés.

(s.) Carlo Wagner, François Bausch, Jean Colombero, Ali Kaes, Viviane Loschetter, Roger Negri.

Ech soen lech Merci fir d'Nolauschteren.

► **Plusieurs voix.**- Très bien!

► **M. le Président.**- Merci dem Här Rapporteur Carlo Wagner.

Wëllt nach een dozou d'Wuert ergräifen?

(Négation)

Dat schéngt net de Fall ze sinn.

Domadder wär d'Diskussioun ofgeschloss.

Esou wéi den Artikel 165 vum Chambersreglement et virgesäit, stëmme mer elo iwwert déi Resolutioun of, déi d'Kontekommissioun virgeschloen huet an déi folgende Wuertlaut huet: «La Chambre des Députés, vu le rapport de sa Commission des Comptes, approuve les comptes de l'exercice 2010 et prie son Président de transmettre la présente résolution et le rapport de la Commission des Comptes à la Cour des Comptes pour y être enregistrés.»

Ass d'Chamber domadder averstanen, à main levée iwwert dës Resolutioun ofzestëmmen?

(Assentiment)

Vote sur la résolution

Ech bieten dann déi, déi mat der Resolutioun vun der Kontekommissioun averstane sinn, d'Hand an d'Luucht ze hiewen.

Dat schéngt mer d'Unanimitéit ze sinn.

Domadder wär dës Resolutioun ugeholl. Esou wéi den Artikel 165 vum Chambersreglement et virgesäit, gëtt dës Resolutioun mam Rapport vun der Kontekommissioun un d'Cour des Comptes weidergereecht.

Mir kommen dann elo zum nächste Punkt vum Ordre du jour, an zwar d'Resolutioun iwwert d'Konte vun der Cour des Comptes fir d'Joer 2010. Hei huet bis elo kee Riedner sech ageschriwwen, duerfir kritt just déi honorabel Madame Anne Brasseur als Auteur vun der Resolutioun d'Wuert.

6. Résolution concernant les comptes de l'exercice 2010 de la Cour des Comptes

► **Mme Anne Brasseur (DP).**- Här President, ech mengen, d'Resolutioun selwer ass explizit genuch. Ech géif just froen, se soll wann ech gelift och vun deenen anere Fraktiounen gedroe ginn, well si dréit nëmme meng Ennerschrëft.

► **M. le Président.**- Et ass entre-temps geschitt, Madame Brasseur.

Wëllt nach soss een dozou d'Wuert ergräifen?

(Négation)

Dat schéngt och net de Fall ze sinn.

Domadder wär och d'Diskussioun ofgeschloss.

Esou wéi den Artikel 158 vum Chambersreglement et virgesäit, stëmme mer also elo iwwert d'Resolutioun of, déi d'Budgetskontrollkommissioun virgeschloen huet an déi folgende Wuertlaut huet: «La Chambre des Députés, vu le rapport du réviseur des comptes de la Cour des Comptes qui estime que „les comptes annuels donnent une image fidèle du patri-

moine et de la situation financière de la Cour des Comptes au 31 décembre 2010, ainsi que des résultats pour l'exercice clos à cette date, conformément au référentiel comptable tel que décrit dans la Note 2 qui fait partie intégrante des comptes annuels”; vu l'accord de la Commission du Contrôle de l'exécution budgétaire avec le rapport du réviseur des comptes marqué suite à l'analyse des comptes en question lors de sa réunion du 21 novembre 2011; approuve les comptes de l'exercice 2010 de la Cour des Comptes.»

Ass d'Chamber domadder averstanen, à main levée iwwert dës Resolutioun ofzestëmmen?

(Assentiment)

Vote sur la résolution

Ech bieten déi, déi mat der Resolutioun vun der Kontekommissioun averstane sinn, d'Hand an d'Luucht ze hiewen.

Dat schéngt mer och d'Unanimitéit ze sinn.

Domadder wär och dës Resolutioun ugeholl. An esou wéi den Artikel 158 vum Chambersreglement et virgesäit, gëtt dës Resolutioun un d'Cour des Comptes weidergereecht.

Eisen nächste Punkt ass d'Resolutioun iwwert d'Konte vum Médiateur fir d'Joer 2010. Hei géif ech och direkt der honorabeler Madame Anne Brasseur d'Wuert ginn.

7. Résolution concernant les comptes de l'exercice 2010 du Médiateur

► **Mme Anne Brasseur (DP).**- Deem ass näischt bäizefügen, Här President.

(Hilarité)

► **M. le Président.**- Wonnerbar. Ech ginn net dervun aus, datt also nach een dozou wëllt d'Wuert ergräifen, esou datt och domadder d'Diskussioun ofgeschloss ass.

An esou wéi den Artikel 5 vum Gesetz vum 22. August 2003 iwwert de Médiateur et virgesäit, stëmme mer elo iwwert d'Resolutioun of, déi folgende Wuertlaut huet: «La Chambre des Députés, vu les comptes clôturés et révisés de l'exercice 2010 du Médiateur arrêtés par le Bureau de la Chambre des Députés lors de sa réunion du 17 juin 2011, approuve les comptes de l'exercice 2010 du Médiateur.»

Ass d'Chamber domadder averstanen, à main levée iwwert dës Resolutioun ze stëmmen?

(Assentiment)

Dat wär esou decidéiert.

Vote sur la résolution

Ech bieten déi, déi mat der Resolutioun vun der Kontekommissioun averstane sinn, d'Hand an d'Luucht ze hiewen.

Dës Resolutioun wär domadder och à l'unanimité ugeholl.

Mir kommen dann elo zum Projet de loi N°6293 iwwert d'Konte vum Exercice 2010. Hei ass d'Riedezäit nom Basismodell festgelegt. Et hu sech bis elo ageschriwwen: den Här Eischen an d'Madame Brasseur. D'Wuert huet elo de Rapporteur vum Projet de loi, den honorabelen Här Fernand Etgen. Här Etgen, Dir hutt d'Wuert.

8. 6293 - Projet de loi portant règlement du compte général de l'exercice 2010

Rapport de la Commission du Contrôle de l'exécution budgétaire

► **M. Fernand Etgen (DP), rapporteur.**- Här President, Kolleginnen a Kollegen, de Projet de loi 6293 iwwert d'Statskonten 2010 ass de 7. Juni 2011 an der Chamber déposéiert ginn. Dobäi gouf dee gesetzlechen Délai nëmme lichter iwwerschratt. Zënter der Reform vun der Statskontabilitéit war et ee virrangedt Zil vun der Budgetskontrollkommissioun, datt d'Debatt iwwert d'Konte keen Exercice de style däerf ginn, mä och als Basis muss dénge fir de Budget.

An dësem Sënn war et duerfir en Haaptuleies vum Rapporteur vum Kont 2009, dem Kolleeg Félix Braz, fir d'Qualitéit vun den Informatiounen iwwert de Kont ze verbessern.

Et war duerfir de Wonsch vun der Kommissioun:

éischtens, ee prezisen Detail iwwert d'Entwécklung vun de Recetten an Dépense vun de Statsfongen ze kréien, esou wéi dat beim Budget am Volume 2 de Fall ass. Et geet jo schlusslech drëm, datt d'Chamber informéiert ass an hiert Kontrollrecht ausübt iwwert d'Resultater vun der öffentlecher Politik, déi en œuvre gesat gëtt mat deene Finanzmëttelen, déi d'Chamber hir zur Verfügung stellt.

zweetens, een Dokument, wat d'Konten no de Regele vum SEC 95 presentéiert.

Här President, ech wëll haut meng Satisfaktioun zum Ausdrock bréngen, datt mer et an der leschter Ligne droite fäerdegbréngen, datt d'Konte vum Virjoer vum Budget gestëmmt ginn. Genugtuung och, datt den Exposé des motifs wesentlech méi Elementer enthalten huet, wéi dat an de Virjoren de Fall war.

Enttäuschung awer, datt d'Regierung deen Detail iwwert d'Spezialfongen eréischt de 27. Juli nogereecht huet, nodeem d'Budgetskontrollkommissioun dat an engem Bréif rappéléiert huet. Well dës Prezisiounen eréischt kuerz virun der Vakanz virlouchen, war et onméiglech, hei een déif grënnege Contrôle ze maachen, wat awer onerlässlech ass, wa mer eis Aufgab wëlle seriö huelen.

Här President, d'Joer 2010 war gekennzeechent vun enger staarker ekonomescher Reprise no där déifer Rezessioun 2009, wou mer beim PIB ee Minus vun 3,6% geschriwwen hunn. D'Regierung war fir 2010 méi wéi virsichteg an hat ee Wuesstum vun 1 bis maximum 1,5% virgesinn. Mä nun ass et awer esou, datt déi kéngsten Droom iwwertraff goufen a mer en ekonomesche Wuesstum vun 3,5% 2010 erreicht hunn. Hei sief bemierkt, datt dës formidable Wuesstum awer nach ënnert der Moyenne vu 4% läit, dee mer an der Zäitschinn vun 1995 bis 2010 kannt hunn.

Um Aarbechtsmaart huet sech dës Wuesstum awer net niddergeschloen. De Beschäftigungstaux ass zwar ëm 1,5% an d'Luucht gaangen, de Chômageaux ass awer net changéiert a läit nach ëmmer bei 6%. Ulass zur Besuegung gëtt, datt de Laangzäitchoimageaux vun 1,8 op 2,3% an d'Luucht gaangen ass.

D'Administration publique huet fir d'Joer 2010 ee Besoin de financement an der Grëssenuerdnung vun 1,7% vum PIB, wat ee Solde de financement négatif vu ronn 700 Milliounen Euro ausmécht; wat natierlech ee beträchtliche Montant ass. Esou wéi fir de Privatmann de Kontoauszuch vun der Bank op den 31. Dezember ee bequeme Mëttel ass, fir feststellen, wéi een iwwert seng Verhältnissen gelieft huet, esou ass dat och mat den Zuele vum Statskont.

Mir haten en Total u Recettë vun 11.021.516.748 Euro, géigeniwwer engem Total vun Dépense vun 10.110.718.775 Euro, wat engem Iwwerschoss vu Recettë vun 910.797.972 Euro gläichkënn. Awer opgepasst: Bei de Recettë sinn 1.597.500.000 Euro vun engem neien Emprunt mat dran, esou datt mer a Wierklechkeet fir d'Joer 2010 een Defizit vu 686,7 Milliounen Euro hunn. Mir kommen also net ëmhin, fir feststellen, datt mer 2010 weider op d'Käschte vun där zukünftiger Generatioun gelieft hunn.

Bei de lafenden Einnahmen hu mer eng Plus-value de recettes vun 11,38%, zum gréissten Deel bei den direkte Steieren, awer och bei der TVA a bei de Participatiounen vum Stat a Privatgesellschaften.

An deene leschte Joren hu mer an dësem Haus öfters iwwert d'Qualitéit vun der Planifikatioun vun de Fiskaleinnahme geschwat. Et ass richtig: D'Lëtzebuurger Economie ass total offen, staark vun der Finanzplaz ofhängeg, an et kann een d'Evolutioun vum PIB net mat darselwechter Prezisioun viraussoe wéi zum Beispill Däitschland oder Amerika.

De Spezialrapport vun der Cour des Comptes iwwert d'Qualitéit vun der Planification des recettes fiscales huet awer eng Rei Defiziter opgedeckt. Mir brauchen ee Comité de prévision mat deene verschiddenen ekonomeschen a fiskaleschen Acteuren, fir bei de Previsiounen op méi performant ekonomesch Muster kënnen zrëckzegräifen. Ech si frou, datt de Finanzminister esou ee Comité an der Tëschenzäit agesat huet.

Weider hu mer nach ëmmer Retardë beim Traitement vun den Dossieren, wat mat sech bréngt, datt d'Solden onprezis an ongewëss bleiwen. Dat gëllt fir d'Recetten, awer och fir d'Remboursementen. Derbäi kommen d'Rapporten zum Schluss vun engem Besteuerungsjoer. Eng transparent Gestion vun de Steuerdossieren wier zum Virdeel vum Stat a vum Steierpflichtegen.

Ze begrëissen ass, datt 2012 den Effektiv vun de Fiskalverwaltungen ëm 25 Leit an d'Luucht geet. Et gëllt och emol erëm eng Kéier am Fong nozefroen, wéi et mat der Fraude fiscale ass.

Déi lafend Dépense sinn 3,24% méi séier gewuess, wéi dat virgesi war. An absoluten Zuele sinn dat 317 Milliounen Euro; wat net näischt ass!

Här President, wat déi finanziell Situatioun vun de Spezialfongen Enn 2010 ubelaangt, musse mer eng Regressioun vun 9% feststellen. Mat Emprunten an der Héicht vun 200 Milliounen



Euro si verschidde Fonge kreditéiert ginn - de Fonds du rail an de Fonds des routes -, esou datt déi real Regressioun bei 18,38% läit. D'Evolutioun vun den Ausgabe war och mat minus 10,14% manner héich, wéi virgesinn.

Esou sinn zum Beispill am Waasserfong nëmme 56,5 Milliounen Euro ausgi ginn, woubäi dach awer 75,3 Milliounen am Budget virgesi waren; ee Minus vu 25%. Fir mech ass dat oerklärlech, wann ee weess, datt Lëtzebuerg Enn Oktober op en Neits vum Europäesche Geriichtshaff zitëiert gouf, well et sengen Aufgaben opgrond vun der Waasserdirektiv net nokënn.

D'EU-Kommissioun huet hei eng forfaitaire Sanktioun vun 2,2 Milliounen Euro an eng deeglech Astreinte vun 11.340 Euro gefrot, wat enger gesamter jährecher Strof vu 6.339.100 Euro entsprécht. Bei deemem Fong missten d'Ausgaben also éischter eropgefuer ginn, anstatt datt mer hei ee substantielle Minus schreiwen!

D'Cour des Comptes huet an hirem Rapport, wéi schonn déi Jore virdrun, festgestallt, datt et Differenze fir verschidde Fongen tëschent dem Kont an den Donnéeën vum Modul SAP gëtt. Hei mussen déi néideg Korrekture virun der Approbatioun vum Kont virgeholl ginn.

Hauptkritikpunkt bei de Spezialfonge bleift, datt d'Informatiounen ni zur Zäit geléiwert ginn, esou datt ee richteg Contrôl net méiglech ass. Bemängelt gëtt och, datt fir verschidde Fonge keng Ventilatioun op déi eenzel Projekte gemaach gëtt. Ze bemierken ass hei, datt awer aus Grënn vu Schutz vu perséinlechen Date fir de Fonds d'assainissement en matière de surendettement an de Fonds social culturel dat net méiglech ass.

D'Budgetskontrollkommissioun bekräfigt hir Fuerderung, datt, éischens, d'Informatiounen iwwert d'Evolutioun vun de Spezialfongen am gesetzlechen Délai, also virum 31. Mee, mam Kont geléiwert ginn. Zweetens, datt mer ee genauen Detail pro Projet kréien, do, wou dat méiglech ass. An drëtens, Explikatiounen iwwert de Fortgang vun deenen eenzelne Projekten, déi vun där Chamber op d'Schinn gesat goufen.

Här President, zesumme mat der Cour des Comptes bedauere mer weider, datt d'Regierung sech, aus Grënn vun ze grousssem Aarbechtsopwand, schwéierdeet, Vergläichstableauen no de Regele vum SEC 95 matzeliwweren.

D'Cour des Comptes weist drop hin, datt eng nei Budgetsstruktur weider op sech waarde léisst. De Finanzminister huet eis an der Kommissioun seng éischt Iwwerleeunge matgedeelt, an all Fraktiounen hunn hei hire Wëllen, fir iwwerparteilech un där dach wichtiger Reform um Wee ze enger méi analytescher Presentatioun vun de Statszuelen aktiv matzeschaffen, bekräfigt. Eng nei Budgetsstruktur géif deelweis de Problem vun den Transferts de crédits léisen, besonnesch, wann et sech ëm minimal Chiffren handelt.

D'Cour des Comptes huet sech méi intensiv mat den ugefouerte Beweegrënn vun den 376 Arrêtés de transferts befaasst, fir feststellen, datt an 83 Fäll dës Transferten net motivéiert waren. Hei hat d'Motivatiounen nëmmen ee Standardcharakter. Intérieur, Famille a Santé waren déi ministeriell Departementer, déi hei am dackste sech net un déi virgeschriwwen Regele gehalten haben. D'Budgetskontrollkommissioun wënscht sech och hei eng méi grouss Disziplin.

D'Cour des Comptes huet sech, wéi aus de Virjore gewinnt, méi intensiv mat der Kontroll vun de Rémunératiounen vun den Agenten, déi beim Stat schaffen, beschäftegt. Dat gëtt, wéi gewinnt, op Basis vun engem Échantillon gemaach. Hei sief virewech bemierkt, datt d'Gehälter 2010 mat 1.892.603.209 Euro ee wichtige Budgetsposten duerstellen. Am Verglach zum Exercice 2009 ass dese Posten ëm 210.780.000 Euro an d'Luucht gaangen, also eng Progressioun vun 12,53%. Dat ass eng zolidd Progressioun, an dat ëmsou méi, wann ee bedenkt, datt mer an deenen zwee Jore virdrun, vun 2007 op 2009, schonn eng Progressioun vu 17% haben!

Am Ganze sinn 3.369 Paidossiere vu Fonctionnaires, Employéën, Aarbechter a Studente kontrolléiert ginn. Dovu waren der 611 - 18,14% - net komplett. No enger kontradiktorescher Géigeniwwerstellung bloufen 1,93% vun den Dossieren onkomplett. An 269 vun den 3.369 Dossieren goufen Onregelméissegkeete festgestallt. Dat si 7,98% vun de kontrolléierten Dossieren. Summa summarum ass d'Budgetskontrollkommissioun der Meenung, datt dës Resultat éischter positiv ass.

D'Kommissioun huet awer ausdrécklech de Wunsch ausgedréckt, datt fir déi nächst Exercicer d'Cour hire Contrôl och op d'Rémunératioun vun de Pensionéierten erweidert. D'Mem-

berer vun der Cour haben eis gesot, datt et hinneen um néidegen Humankapital géif feelen, fir dese Contrôl duerchzeféieren. D'Budgetskontrollkommissioun freet sech dofir, ob et net opportun ass, fir d'Effektiver an där ieweschter Carrière vun der Cour des Comptes eropzesetzen.

A sengem Avis vum 15. November huet de Statsrot sech virun allem Froe gestallt wéinst de signifikativen Écarté bei de Previsiounen vun de Statsrecetten. Och wann déi besser Konjunktur e wichtige Facteur bei de méiglechen Explikatiounen ass, freet de Statsrot sech, wat de wierklechen Impakt vun anere Facteuren ass, wéi d'Steierhéijungen; wéi d'Efforté vun de Fiskalverwaltungen, fir d'Besteuerungsdélaien erfrozeschrauwen; wéi een Impakt datt déi administrativ Gestiou, souwuel vum Bezuele vu Steiere wéi och d'Remboursementer, huet; a last but not least, wéi et mat der Steuerhannerzëiung ass.

De Statsrot bescheinegt der Regierung eng gutt Maîtrise vun de Budgetausgaben, incitéiert d'Regierung awer ausdrécklech, hir Spuerefforté bei der Gestiou vun den öffentleche Gelder net lasszeloossen. De Statsrot seet och, datt déi jëtzege Presentatioun vum Statskont net géeegeent ass, fir ekonomesch a finanziell Analysen ze maachen.

Weider rappeliert de Statsrot d'Wichtigkeet, fir eng Presentatioun vun Zuelen no de Regele vum SEC 95 ze kréien, fir eng komplett Analys vun der Finanzgestioun vum Gesamtstat ze maachen. De Conseil d'État mécht sech och Suergen, datt fir 2010 de Besoin de financement vum Zentralstat sech op 1.333.000.000 beleeft.

Här President, ofschléissend wéilt ech festhalen, datt d'Budgetskontrollkommissioun zefridden ass, datt d'Chamber hirer Kontrollaufgab ëmmer besser ka gerecht ginn. Et géllt, déi ugeschnidden Defiziter am Viséier ze behalen. Ee Merci un d'Membere vun der Cour des Comptes, déi säit hirer Asetzung am Joer 1999 eis Kommissioun op deem dote Wee exzellent begleet.

An deem Sënn bieten ech d'Chamber, de Kont vum Exercice 2010 ze stëmmen, an ech soen lech Merci fir d'Nolauschteren.

► **Plusieurs voix.** - Très bien!

► **M. le Président.** - Merci dem Här Rapporteur Etgen. D'Wuert kritt elo den Här Félix Eischen.

Discussion générale

► **M. Félix Eischen (CSV).** - Här President, Dir Dammen an Dir Hären, virewech en décke Merci dem Rapporteur Fernand Etgen fir säi Rapport, dee ganz ausféierlech an detailléiert dat erëmginn huet, wat mir och an der Budgetskontrollkommissioun geschwat an décidéiert hunn.

Ech wollt hei bei där Geleeënheet net nach eng kéier am Detail op d'Joer 2010 agoen, e Joer, wat awer vläicht esou bal net méi wäert erëmkommen, wann ee bedenkt, dass mer eng zolidd Reprise économique haben, mat engem Wuesstum vun 3,5%, wou am Virfeld virsiichteg 1,5% prognostizéiert goufen. 2010 huet mat engem Recetteniwwerschoss vun 910 Milliounen ofgeschloss, an nëmme 25 Milliounen ware virausgesot ginn.

Esou een Iwwerschoss géif ee fir déi nächst Jore mat zwou Hänn ënnerschreiw. E gutt Joer also, kann ee soen, wann net, jo, wann net awer d'Dépenses courantes et en capital ëm 4,4%, spréich 426 Milliounen am Verglach zu 2009 an d'Luucht gaange wieren. Dat sinn 3,24% méi, wéi am Budget virgesi waren. D'Dépenses ordinaires ware mat 317 Milliounen och méi héich wéi de Budget. Dee stäerkste Poste bei den Zousazausgaben ass ganz kloer d'Zréckbezuere vun der Dette publique, déi mat iwwer 133 Milliounen Euro an d'Gewicht geschloen huet.

Schold maachen ass u sech einfach - normalerweis -, mä egal wéi, datt Dommt ass a bleift derbäi, dass een déi Suen och eng kéier muss zréckbezuelen. Allerdéings, a mir erënneren eis jo all drun, huet d'Regierung sech engagéiert, bis 2014 déi öffentlech Finanzen am Équilibre ze hunn an d'Statsverscholdung mat der Zënslascht a Grenzen ze halen.

Am Kontext vun deem Engagement huet d'Regierung des Weideren ugekënnegt, 2012, dat nächst Joer also, e sougenannten „mid-term review“ ze maachen, eng Revue à mi-parcours vun der Budgetpolitik. Dat heescht, et gëtt eng Evaluatioun vun den Efforté gemaach, a wann déi dann onbefriddend sinn, sollen nei Konsolidéierungsmoosnamen décidéiert ginn, fir den Objektiv 2014 vum équilibréierte Budget ze erreechen. Mir hoffen op eng éierlech Analys, Dir Dammen an Dir Hären, well mir

sinn definitiv net méi an der Zäit, och nëmmen iergendeppes schéinzeschwätzen.

Här President, aus dem Rapport wéll ech och nach kuerz de Statsrot zitëieren, deen den Iwwerschoss duerch déi verbessert Konjunktur vun 2010 erkläert a sech awer trotzdeem wonnert, dass soss keng Ursaache fir de groussen Écart tëschent de budgétiséierten an de reelle Recetté konnt fonnt ginn. Wéi steet et mat den Efforté vun der Steierverwaltung, d'Retarden opzeschaffen? A wat fir ee Gewicht hu bei de Resultater vun de Konten 2010 d'Efforten, déi gemaach gi si géint d'Fraude fiscale?

Ech wéll de Krees zoumaachen a résuméieren, dass, fir dat gesatent Zil, 2014 équilibréiert Finanzen ze hunn, 2010 427 Milliounen manner an 2011 247 Milliounen manner hätte missen op der Dépensésäit stoen.

Als Konklusioun ënnersträichen ech och, dass d'Budgetskontrollkommissioun sech de Remarque vum Statsrot uschléisst, fir méi Suerg bei den Analysen am Virfeld ze droen, dass um Enn d'Differenz vun deem, wat derbäi erauskomm ass, net esou wäit ewech vun deem soll leien, wat am Ufank budgétiséiert ginn ass. 2010 huet dat zum Gudden ausgeschloen, mä wann de Pendel déi aner Säit ausschléisst - ausschléit, pardon -, dann hu mer e Problem.

D'Finanzprevisiounen sinn a wäerten an den nächste Joren eng ganz bedeitend Roll an deem Land spillen. Ech wéll och nach ganz kuerz un eng Note erënneren, déi bei der Regierungserklärung 2009 gemaach gouf, wou de Groupe de travail „finances publiques“ eng Ufro u Statec, IGF an IGSS gemaach huet, fir mat der Steierverwaltung zesummen déi haapt makroekonomesch Linne fir d'Period 2009-2014 ze zéien.

Mat dese Konklusiounen a Reflexiounen ginn ech natierlech den Aval vun der CSV-Fraktioun zu deemem Projet an ech soe Merci fir d'Nolauschteren.

► **Plusieurs voix.** - Très bien!

► **M. le Président.** - Ech soen dem Här Eischen Merci. Als nächst Riednerin ass d'Madame Anne Brasseur agedroen. Madame Brasseur, Dir hutt d'Wuert.

► **Mme Anne Brasseur (DP).** - Här President, et ass fir d'Éischt, menger Erënnerung no, dass mer et als Chamber fäerdegbréngen, dass d'Konte vum Joer virdu virun der Diskussioun an der Approbatioun vum Budget kënnen gestëmmt ginn. A mir mussen als Chamber wierklech all deene Merci soen, déi gehollef hunn, dat méiglech ze maachen.

Mä et ass eng Obligatioun, et ass eng Obligation légale, mir hunn d'Gesetz iwwert d'Kontabilitéit vum Stat vun 1999, do sinn Délaie virgeschriwwen, an déi Délaie, déi sinn zum Deel agehale ginn. D'Regierung hat e lichte Retard vun enger Woch mat dem Dépôt vun de Konten. D'Cour des Comptes huet sech och net genee un d'Délaie gehalten, a mir mussen och do als Chamber zesumme mat all deenen, déi hëllefen, deen doten Exercice ze maachen, mir mussen et zesumme fäerdegbréngen, d'Dispositions légales anzehalen. Dat ass e Minimum! Mä mir sinn dës kéier fir d'Éischt der Saach méi no komm. An ech géif jiddwerengem wëlle Merci soen, an och dem Rapporteur, dem Här Etgen, e ganz grouse Merci!

Et ass haut ëmsou méi wichtig, dass mer d'Dépensé maîtriséieren an dofir als Chamber och kucken, wat d'Regierung da mat engem Budget, dee mir hei stëmmen, mécht, ob se deen esou exekutéiert, wéi mer deen hei gestëmmt hunn. Et ass ëmsou méi wichtig an enger Finanzkris, an enger Wirtschaftskris an enger Vertrauenskris, dass mir mam gudden Beispill virginn a wierklech kucken, dass ee rigouréis mat den Dépenses publiques ëmgeet.

„Mir brauche gesond Statsfinanzen“, huet elo virun enger Stonn de Finanzminister hei op där Tribün gesot. Recht huet en domat, mä fir gesond Statsfinanzen ze hunn, muss een och Rigueur bei der Applikatioun vum Budget unweisen. A wann een d'Konte vun 2010 kuckt, da stellt een awer fest, dass mer nach ëmmer en Defizit vu 700 Milliounen hunn.

Deen Defizit ass manner héich wéi dat, wat mer gemengt hunn, wéi de Budget hei gestëmmt ginn ass, mä deen Defizit, dat sinn awer nach ëmmer 700 Milliounen! An d'Defizit muss ee jo och accumuléieren. Dat heescht, wa mir all Joers en Defizit maachen, da geet dat op d'Käschte vun der Marge de manœuvre vun duerno. Et geet awer net nëmmen op d'Käschte vun der Marge de manœuvre vun duerno, mä et geet op d'Käschte vun der nächster Generatioun. Eppes, wat mer op kee Fall kënnen akzeptéieren! Och de Finanzminister selwer huet dat virdu gesot, dass mer Rigueur mussen hunn.

An ech si frou, dass de Finanzminister elo heibannen ass, fir ze soen, Här President, dass mer ganz frou sinn als Fraktioun vun der Demokratescher Partei iwwert dat, wat de Finanzminister elo grad haut hei gesot huet: dass en d'nächst Joer wëllt Kontakt opheuele mat all deenen, déi concernéiert sinn, och alle politesche Parteien, Jugendmouvementer, fir ze kucken, wéi ons Finanzpolitik an deenen nächste Jore soll sinn. D'Ennerstëtzung vun der Demokratescher Partei huet e selbstverständlech dobäi.

Mir hunn och eng Proposition op den Dësch geluecht, wéi mir als Demokratesch Partei gesinn, dass ee soll mam Budget ëmgoen. De Finanzminister huet gesot, hie géif eng nei Proposition maachen, wéi an Zukunft - an e wor jo och schonn do an der Finanzkommissioun mat deene Propositionen, mat enger éischter Orientatioun -, wéi an Zukunft de Budget, d'Struktur vum Budget soll ausgericht ginn.

Ech si frou, dass de Finanzminister d'Initiativ hält, fir d'nächst Joer eng Consultatioun ze maachen. Well dat ass eng Aufgab, op déi mer scho laang gewaart hunn a wou mer ons froen, firwat dat net schonn éischter geschitt ass. Well et ass wierklech akuten Handlungsbedarf do! An dee Rôle, deen de Finanzminister elo ënnerhält a wou mer en derbäi ënnerstëtzen, ass am Fong e Rôle, deen de Premierminister scho wéi déi éischt schlecht Zeeche koumen hätt missen iwwerhuelen. Mir wëssen all, dass de Premierminister mat aneren Dossieren iwwerheeft ass an och mat anere Problemer a sécher dofir keng Zäit dofir hat. Dofir Merci dem Finanzminister, dass en dat mécht. Mä mir hätte léiwer gehat, dat wier vill éischter geschitt!

Den Train de vie vum Stat, huet de Finanzminister gesot, geet elo 2012 4,5% an d'Luucht. Dat ass awer an onsen Aen nach ganz vill.

Ech wéll nach ee Wuert soen zum Budgetsrapporteur. Ech hu mat Opmierksamkeet och seng Interviewe gelies an eede seeng Analys. Allerdéings, mat senger Konklusioun sinn ech net d'accord, well d'Konklusioun kéint nëmmen déi sinn, dass e géint de Budget vun 2012 géif stëmmen.

► **Plusieurs voix.** - E mécht dat, e mécht dat jo och.

► **Mme Anne Brasseur (DP).** - Dat wier a mengen Aen déi eenzeg richteg Äntwert, déi en dorop konnt ginn no deene puer Observatiounen.

Mir hunn hei limitéiert Riedezäit fir awer, Här President, e wichtigen Exercice. E wichtigen Exercice, well et ass d'Kontrollfunktoun vum Parlament, fir d'Regierung ze kontrolléieren. Ech wéll soen, dass, wat d'Dépenses ubelaangt, beim Exercice 2010 awer Rigueur ugewannt ginn ass. Mir hunn awer nach ëmmer en Defizit vu 700 Milliounen. An dat musse mer onbedéngt an de Grëff kréien!

Mä d'Gestioun vum Budget, mat e puer Ausnahmen a verschidde Ministère, an den Här Etgen huet dat als Budgetsrapporteur gesot, d'Gestioun vum Budget wor awer insgesamt bei den Dépensé gutt. Dofir wäerte mir als Demokratesch Partei och onsen Accord ginn an nach eng kéier de Finanzminister ënnerstëtzen, dass mer e responsable Budget kréien. Well mir iwwerhuelen och ons Responsabilitéit! Well dat ass eng vun deene gréissten Aufgaben, fir déi mer iwwerhaupt gewielt gi sinn a fir déi mer e Mandat kruten, hei an der Chamber ze siégieren.

Ech soen lech Merci.

► **Une voix.** - Très bien!

► **M. le Président.** - Ech soen der Madame Brasseur Merci. Ech hunn elo soss keng aner Wuertmeldung méi, sou datt ech nach dem... De Finanzminister brauch och net méi ze intervenéieren. Domadder wär d'Diskussioun ofgeschloss a mir kéimen dann zur Ofstëmmung iwwert de Projet de loi N°6293.

Vote sur l'ensemble du projet de loi et dispense du second vote constitutionnel

D'Ofstëmme fänkt un. Fir d'Éischt déi perséinlech Stëmmen. De Vote par procuration. De Vote ass ofgeschloss.

De Projet de loi N°6293 ass ugehol mat 58 Jo-Stëmmen, géint 1 Nee-Stëmm.

Résultat définitif après redressement: le projet de loi 6293 est adopté par 59 voix pour et 1 voix contre.

Ont voté oui: Mmes Diane Adehm, Sylvie Andrich-Duval, Nancy Arendt (par M. Lucien Clement),



MM. Fernand Boden (par Mme Christine Doerner), Lucien Clement, Mme Christine Doerner, MM. Emile Eicher, Félix Eischen, Mme Marie-Josée Frank, MM. Léon Gloden, Norbert Hauptert, Ali Kaes, Marc Lies, Mme Martine Mergen, MM. Paul-Henri Meyers, Laurent Mosar, Marcel Oberweis, Gilles Roth, Jean-Paul Schaaf, Mme Tessy Scholtes, MM. Marc Spautz, Robert Weber, Lucien Weiler, Raymond Weydert, Serge Wilmes et Michel Wolter;

MM. Marc Angel, Alex Bodry, Mme Claudia Dall'Agnol, M. Fernand Diederich, Mme Lydie Err (par M. Alex Bodry), MM. Ben Fayot, Claude Haagen, Jean-Pierre Klein, Lucien Lux, Mme Lydia Mutsch (par Mme Claudia Dall'Agnol), MM. Roger Negri, Ben Scheuer et Mme Vera Spautz;

MM. André Bauler, Eugène Berger (par M. Carlo Wagner), Xavier Bettel, Mme Anne Brasseur, MM. Fernand Etgen, Paul Helminger, Claude Meisch

(par M. Xavier Bettel), Mme Lydie Polfer et M. Carlo Wagner;

MM. Claude Adam, François Bausch, Félix Braz, Camille Gira, Henri Kox, Mmes Josée Lorsché et Viviane Loschetter;

MM. Jean Colombero (par M. Gast Gibéryen), Gast Gibéryen, Jacques-Yves Henckes et Fernand Kartheiser.

A voté non: M. Serge Urbany.

Gëtt d'Chamber d'Dispens vum zweete Vote constitutionnel?


(Assentiment)

Et ass also esou décidéiert.

Domadder si mer um Enn vun eiser Sitzung ukomm. D'Chamber kënnert muer um néng Auer nees zesummen.

D'Sitzung ass opgehuewen.

(Fin de la séance publique à 15.51 heures)



SÉANCE 9

JEUDI, 8 DÉCEMBRE 2011

Présidence: M. Laurent Mosar, Président • M. Michel Wolter, Vice-Président

Sommaire

6350 - Projet de loi concernant le budget des recettes et des dépenses de l'État pour l'exercice 2012 (suite)

- Discussion générale: M. Marc Spautz, M. Claude Meisch, M. Lucien Lux, M. François Bausch

Au banc du Gouvernement se trouvent: MM. Luc Frieden, Mars Di Bartolomeo, Jean-Marie Halsdorf, Mme Octavie Modert et M. Romain Schneider, Ministres.

(Début de la séance publique à 9.00 heures)

► **M. le Président.**- Ech maachen d'Sitzung op.

Huet d'Regierung eng Kommunikatioun ze maachen?

► **M. Luc Frieden**, *Ministre des Finances.*- Neen, Här President.

► **M. le Président.**- De Moie fänke mer mat eise Budgetsdebatten un. D'Riedezäit ass hei nom Modell 6 festgeluecht, an et hu sech bis elo ageschriwwen: déi Häre Spautz, Meisch, Lux, Bausch, Gibéryen, Urbany a Bodry. Als éischte Riedner ass den honorabelen Här Marc Spautz agedroen. Här Spautz, Dir hutt d'Wuert.

6350 - Projet de loi concernant le budget des recettes et des dépenses de l'État pour l'exercice 2012 (suite)

Discussion générale

► **M. Marc Spautz** (CSV).- Här President, léif Kollegeinnen a Kollegen, mam Budgetsrapport 2012 diskutéiere mir elo iwwert den éischte Budget, deem no der neier Prozedur vum Semestre européen ausgeschafft ginn ass, een, dee fir méi Koordinatioun tëschent den europäesche Budgets- a Wirtschaftspolitik steet.

De Rapporteur, den honorabele Gilles Roth, huet déi nei Prozedur detailléiert a sengem schréffleche Rapport duergeluecht. Hien huet en Dokument erstallt vun iwwer 259 Säiten, e Reflexiounspabeier mat Informatiounen a villen Tableaux, déi engem plastesch weisen, wéi wichteg et ass ëmzedenken, fir datt mir eis d'Zil vun engem ausgeglachene Budget 2012 errechen. Dëst muss kuerzfristig, awer och virun allem mëttelfristeg geschéien. Ech wëll dem Gilles Roth am Numm vun eiser Fraktioun fir dëse Rapport e grouss Merci soen!

Kollegeinnen a Kollegen, den Horizont, op dee mir hischaffan, ass, fir 2014 de budgetären Équilibre nees erreecht ze hunn. 2014 ass d'Enn vun dëser Legislatur, iwwert déi eraus d'Regierung sech net engagéiere kann an iwwert déi Period eraus mir 60 heibannen och kee Mandat hunn. D'Viraussetzung fir déi nei néideg Trendwend ass d'Bereetschaft, datt mir dat virleidend Zuelematerial an déi verschidde Propositionen oder Iddien an d'selwecht interpretéieren.

„Voir, juger, agir“, datt ass de Leetsproch vum Kardinol Cardijn gewiescht, dem Grënner vun der JOC, der „Jeunesse ouvrière catholique“. Dëse Sproch, deem ech doheem als Kand ëm-

mer an ëmmer erëm ze héiere kritt hunn, ass och de Sproch, ënnert deem ech de Budget analyséieren a jugéieren.

► **Une voix.**- Très bien!

► **M. Marc Spautz** (CSV).- Den elo virleidend Budget kann awer net richtig betruecht a bewäert ginn, ouni e Réckbléck ze maachen.

Här President, léif Kollegeinnen a Kollegen, am September 2008 ass d'Bank Lehman Brothers an den USA an d'Faillite gaangen an huet domadder e wirtschaftlecht a finanzpolitescht Aerdbiewen ausgeléist vun engem Ausmooss, deem ee sech deemools net esou richtig bewusst war. D'Nowéie spiert een nach haut!

Wann déi griichesche Scholdekris zum Beispill, déi eis an d'ganz Welt an Otem hält, zum allergreisten Deel hausgemaach ass, esou huet d'Kris vun 2008/2009 och zur Verschäerfung vun der prekärer Lag vu Griichenland bäigedroen. An dat, wat fir Griichenland gëllt, gëllt och fir all anert EU-Land. D'Banken- an d'Finanzkris vun 2008, déi ee Joer méi spët zu enger Wirtschaftskris mutéiert ass, huet Spuren hannerlooss. Mir hunn zënterdeem déi allergreiste Méi, fir nees laangfristeg de Wee vum Grëschwong ze fannen. D'Persistenz vun der griichescher Scholdekris riskéiert, zu enger Zeräissprouf fir d'EU ze ginn an negativ Konsequenze mat sech ze droen.

Béis Zonge behaapten, Griichenland wier den Europäer hir Lehman Brothers. D'Kris a Griichenland war den Optakt fir d'Scholdekris an der Eurozon. No Griichenland hunn Irland a Portugal esou grouss finanztechnesch Problemer kritt, datt se hu misse gehollef kréie via de Rettungsfong. Aner Länner sinn ugeschloen, wéi Spuenien, Frankräich, mä och a virun allem Italien. Esou gutt wéi keen EU-Land ass verschout, och wann d'Situatioun bei deem engen net gradesou dramatesch ass wéi bei deem aneren.

Zënter dësem Summer kënnert bei d'europäesche Scholdekris nach eng nei Bankekris derbäi. D'Banken, déi extrem exposéiert sinn, leide weider ënnert de Konsequenze vun der europäescher Scholdekris. D'Banke sinn zum Deel ënnerkapitaliséiert. Si hunn och nach ëmmer vill ze vill toxesch Pabeieren. D'Konsequenz ass déi, datt vill Banken net genuch Liquiditéiten hunn, fir kënnen Sue selwer ze léinen, wat sech natierlech op d'Wirtschaft nidderschléit.

D'Amerikaner fäerten, datt den „bank run“, deem d'Kris 1929 ausgeléist huet, kéint erëm kommen, wou jiddweree seng Sue vun der Bank ewechgehol huet. Dat wier dramatesch. Fir esou eng Situatioun ze vermeiden, fir d'Mäert ze berouegen, hunn déi lescht Woch déi sechs wichtegst Noutebanken décidéiert, de globale Finanzsystem ze ënnerstëtzen a Form vu Liquiditéitsfluxen, déi an de System

eragepompelt ginn. Dës Entscheidung soll d'Spannung op de Mäert reduzéieren an de Finanzinstituter genuch Liquiditéiten zur Verfügung stellen, datt si genuch Suen hunn, fir d'Wirtschaft ënnert der Form vun de Präten unzekuerbelen.

D'Griichenlandkris huet virun allem d'Schwächte vun der EU ervirgehuewen. Ob schonns d'EU-Länner a virun allem d'Länner aus der Eurozon ofhängeg si vuneneen, feelt et nach ëmmer un enger adequater budgetärer a wirtschaftlecher Koordinatioun. Woubäi ee fairerweis muss soen, datt scho viles op deem Gebitt geschitt ass: de Semestre européen, „Europa 2020“, de Pacte Euro.

De Problem ass, datt eis d'Zäit fortleeft, fir ofzewaarden, ob dës Moossname konkret gräifen. De Semestre européen ass eréischt agefouert ginn. Eréischt d'nächst Joer kënnen mir gesinn, ob dat eppes bruecht huet oder net. Mir hunn net méi vill Zäit, an d'Mäert spillen dorobber. Si spekuléieren, si hunn awer och vläicht d'Gedold net, fir ofzewaarden, fir ze kucken, ob de Semestre européen zum Beispill eng gutt Initiativ war, oder vläicht si se midd ofzewaarden, datt d'Europäer endlech waakreg ginn a verstinn, datt se alleguerte gemeinsam müssen den Dossier Scholdekris ugoen.

D'Drohung vun der Ratingagentur Standard & Poor's, d'Kreditratinge vu 15 Membere an der Eurozon, eis Lëtzebuerger inklusiv, an deenen nächste Wochen erofzesetzen, spigelt de Verloscht u Vertraue vun deenen Investisseuren an d'Fäegkeet vun der EU, a virun allem an der Eurozon, d'Kris ze meeschteren. Souguer de Rating vum Rettungsfong soll, deemno wéi, erofgesat ginn. D'Investisseure gleewen net méi dorunner, datt déi 17 Eurolänner, a scho guer net déi 27 EU-Länner et fäerdegbrénge wäerten, sech op gemeinsam Léisungen a Moossnamen ze verstännegen. An et kann een hinnen net béis sinn. D'Politik an Europa huet net gegläntzt an deene leschte Wochen a Méint.

Den Optritt vum franséische President a vun der däitscher Kanzlerin de Méindeg ass an deem Sënn positiv ze bewäerten, datt d'Schwéiergewichter vun der EU endlech schéng sech openeen zouzebewegen. Grad elo zielt et, datt de franséisch-däitsche Motor net aussetzt.

Dësen Optritt huet awer net déi erwünschten Auswierkunge gehat, wann een d'Drohung vun de Ratingagenturen kuckt. Viles vun deem, wat se de Méindeg proposéiert hunn a wat se wëllen haut an de Freideg um Sommet gemeinsam virleeden, ass näischt Neies. Vill Iddien si scho viru laanger Zäit diskutéiert ginn a sinn un den Divergenzen tëschent grad Frankräich an Däitschland gescheitert. Vill kostbar Zäit ass verluer gaangen, vill Vertrauen ass verspillt ginn.

Et ass bekannt, datt keng Léisung machbar ass, wann ee vun deenen zwee Länner se net matdréit. Dës zwee Länner hunn eng enorm Responsabilitéit. Den Helmut Kohl, de François Mitterand an de Jacques Chirac ware sech dëser historiescher Responsabilitéit bewusst a waren och bereet, iwwer hire Schiet ze sprangen. Frankräich an Däitschland dierfe weder Léisungen, déi hinnen aus nationale Grënn net gefallen, blockéieren nach deenen anere Länner Léisungen opzwéngen. Si hu Virbildcharakter an als solch solle si sech ëmmer fir déi gemeinschaftlech Method asetzen.

Ech bedauern, datt d'Madame Merkel an den Här Sarkozy sech net ëmmer virbildlech verhalten, wann et ëm Europa geet. Ech hätt et gutt

fonnt, wa se hir Proposé bis zum Sommet fir sech gehalen hätten, datt se dann dës Proposé mat hiren Homologen diskutéiert hätten an all Entscheidung als eng gemeinschaftlech Entscheidung verkaaft hätten. Dat wier menger Meenung no genee dee richteg gemeinschaftleche Werdegang, op dee vill Leit waarden. Mir hätten domadder sécherlech d'Kakofonie vun deene leschte Méint verhënnert an d'Kris hätt net dat Ausmooss ugeholl, dat se haut huet an dat se och net verdéngt.

Well wann een den Experten nolauschtert, ass de Problem an Europa bei aller Problematik guer net esou schlëmm wéi 2008 bei der Faillite vu Lehman Brothers. D'Suergekand Griichenland kréie mir op déi eng oder aner Manéier geregelt. D'Situatioun an Irland schéngt sech ze stabiliséieren.

Wat Italien ugeet, muss dat Land zwar Kreditter ophuelen an dofir méi wéi 7% Zënse bezuelen, mä dat Land kritt de Moment nach Sue geléint. Italien huet och eng Rei vu couragéierte Reformen ugekënnegt, déi, wa se gestëmmt ginn an ëmgesat ginn, dem Land deen néidege Spillraum kéinte ginn, fir sech nees ze erkréien. Vill Experten, virun allem amerikanesch Bankexperten, ginn dovunner aus, datt Italien de Potenzial huet, fir selwer ouni Hëllef aus der Kris erauszekommen.

Frankräich, wéi Italien, muss méi Zënse bezuelen, mä och hei ass Frankräich nach an enger Situatioun, wou et Sue geléint kritt. Et ass awer kloer, datt dëst net onendlech geet. En Trend zeechent sech of: Ëmmer méi Investisseuren zécken, fir an de Krisestaten ze investéieren.

D'Zil fir all Land ass et, seng Schold ze kierzten an den Defizit ofzebauen. Net fir näischt sinn iwwerall Spuermoossnamen a Reforme fir d'Wirtschaft unzekuerbelen ugekënnegt. Mä eng Konditioun sine qua non, fir datt Spuermoossnamen, déi op nationalem Niveau ergraff ginn, och déi erwünschte Konsequenze mat sech bréngen, ass déi, datt d'Scholdekris um europäeschen Niveau gemeeschtert gëtt.

De Sommet zu Bréissel, deem haut a muer stattfënnert an op deem d'ganz Welt a besonnesch d'Investisseure wäerte kucken, wäert - hoffen ech - d'Weiche fir e Gesamtkonzept stellen. Ech erwaarde mir net méi, awer och net manner. Deen, dee mengt, datt de Freideg alles décidéiert gëtt, alles ficeléiert ass, datt et da mam Sommet gedoen ass, deem iert gewaltig.

Par contre, et wier héich Zäit, datt mir d'Richtung ugin, wou et soll higoen. Mir brauche souwuel kuerzfristeg Mesuren, fir deenen ugeschloene Länner ënnert d'Äerm ze gräifen, wéi och mëttelfristeg a laangfristeg Moossnamen, fir an Zukunft Krisen ze verhënnere respektiv besser ze géieren. Et ass evident, datt net alles op engem Sommet kann entscheet ginn. Mä d'Richtung muss genee festgeluecht ginn, d'Solidaritéit an d'Unitéit müssen nees an de Vierdergrond réckelen. Europa muss gemeinsam aus engem Mond schwätzen, muss gemeinsam Léisunge virdroen. Et ass keng Plaz fir Divergenze méi.

D'Madame Merkel huet net komplett Recht, wa se seet: „Was eine Ratingagentur macht, das ist in der Verantwortung der Ratingagentur.“ Et ass zumindest zum Deel, wéi am Fall vun der Scholdekris an der Eurozon, och d'Verantwortung vun der Politik. D'Ratingagenturen an d'Mäert reagéiere sensibel op all Ausso, all Initiativ, all Léisungsvorschlag vun europäesche Politiker. Dat muss ee wëssen, ier een an d'Öffentlecheit geet.